

“Službene novine Kantona Sarajevo”, broj 3/09

Na osnovu člana 7. Zakona o izmjenama i dopunama Zakona o pečatu Kantona Sarajevo ("Službene novine Kantona Sarajevo", broj 39/08) i člana 172. stav 1. Poslovnika Skupštine Kantona Sarajevo ("Službene novine Kantona Sarajevo", broj 12/05 – Prečišćeni tekst i broj 7/08), Zakonodavno - pravna komisija Skupštine Kantona Sarajevo, na sjednici od 23.januara 2009.godine, utvrdila je Prečišćeni tekst Zakona o pečatu Kantona Sarajevo.

Prečišćeni tekst Zakona o pečatu Kantona Sarajevo obuhvata: Zakon o pečatu Kantona Sarajevo ("Službene novine Kantona Sarajevo", broj 9/99), Zakon o izmjeni Zakona o pečatu Kantona Sarajevo ("Službene novine Kantona Sarajevo", broj 8/01), Zakon o izmjenama i dopunama Zakona o pečatu Kantona Sarajevo ("Službene novine Kantona Sarajevo", broj 16/03) i Zakon o izmjenama i dopunama Zakona o pečatu Kantona Sarajevo ("Službene novine Kantona Sarajevo", 39/08), u kojim je naznačen dan stupanja na snagu tih zakona.

Broj 01-05-1113/09
23.januar 2009. godine
Sarajevo

Predsjednik
Zakonodavno-pravne komisije
Esad Hrvačić,s.r.

ZAKON O PEČATU KANTONA SARAJEVO (PREČIŠĆENI TEKST)

I - OPĆE ODREDBE

Član 1.

Ovim zakonom utvrđuju se organi koji imaju pravo na pečat Kantona Sarajevo (u daljem tekstu: Kanton), oblik i sadržaj pečata, izrada pečata, čuvanje i upotreba pečata, kao i druga pitanja od značaja za provođenje ovog zakona.

Član 2.

Pečat Kantona (u daljem tekstu: pečat) imaju:

- Kanton;
- Skupština Kantona;
- Vlada Kantona;
- kantonalna ministarstva, kantonalne uprave i kantonalne upravne organizacije , stručne i druge službe koje osniva Vlada Kantona i drugi kantonalni organi i organizacije;
- sudovi Kantona;
- Kantonalno tužilaštvo;
- Pravobranilaštvo Kantona;
- Štab civilne zaštite Kantona;
- javne ustanove čiji je osnivač Kanton, ako pravilima javne ustanove nije drukčije određeno.

U slučaju da javna ustanova svojim pravilima određuje oblik i sadržaj pečata, tim pravilima se uređuje i način izrade pečata, čuvanje i upotreba pečata i druga pitanja od značaja za izradu i upotrebu pečata.

Član 3.

Pečatom se potvrđuje autentičnost službenih akata organa iz prethodnog člana ovog zakona.

II - OBLIK I SADRŽAJ PEČATA

Član 4.

Pečat ima oblik kruga, a u prvom koncentričnom krugu sadrži tekst: “Bosna i Hercegovina - Federacija Bosne i Hercegovine”, u drugom koncentričnom krugu tekst: “KANTON SARAJEVO”, ispisan velikim slovima i u trećem koncentričnom krugu naziv i sjedište organa iz člana 2. ovog zakona.

Nazivi iz prethodnog člana ispisuju se istovremeno latinicom i ćirilicom.

U sredini pečata je grb Kantona.

Član 5.

Pečat Kantona ima prečnik od 70 mm, a pečati ostalih organa iz člana 2. ovog zakona imaju prečnik od 50 mm (veliki pečat) i 30 mm (mali pečat). Izuzetno, pečat organa iz člana 2. ovog zakona može biti i prečnika 20 mm.

Član 6.

Organi iz člana 2. ovog zakona u pravilu imaju jedan pečat prečnika 50 mm i jedan pečat prečnika 30mm, a mogu imati i po jedan pečat prečnika 20 mm i prečnika 30 mm za otiske u pečatnom vosku.

Ako je to neophodno, zbog organizacije rada, organi mogu imati i više pečata iz prethodnog stava, s tim da su dužni posebno obrazložiti takav zahtjev.

Ako organi iz člana 2. ovog zakona imaju više pečata iste veličine i sadržine, svaki primjerak mora biti označen brojem.

Premijer ima pravo koristiti pečat Vlade Kantona.

III - IZRADA PEČATA

Član 7.

Pečat izrađuje pečatoreznica koju ovlasti Ministarstvo pravde i uprave Kantona (u daljem tekstu: Ministarstvo), u skladu s rješenjem o odobrenju izrade pečata i od materijala koji najviše odgovara svrsi upotrebe pečata.

Član 8.

Nadzor nad radom pečatoreznice ovlaštene za izradu pečata, u pogledu izrade pečata, vrši Ministarstvo.

Član 9.

Izradu pečata rješenjem odobrava Ministarstvo.

Ministarstvo će rješenjem odbiti zahtjev za odobravanje izrade pečata ako podnosilac zahtjeva nema pravo na pečat Kantona ili ako se zahtjev odnosi na

odobranje izrade pečata čiji su sadržaj, dimenzije i broj primjeraka suprotni odredbama ovog zakona.

Primjerak rješenja o odobravanju izrade pečata Ministarstvo dostavlja Ministarstvu unutrašnjih poslova Kantona.

Član 10.

Izrađene pečate, do predaje organu, ovlaštena pečatoreznica dužna je čuvati na sigurnom mjestu i odmah nakon izrade pečata uništiti sve matrice, kao i neuspjele i probne primjerke pečata.

Član 11.

Ministarstvo vodi evidenciju o svim izrađenim pečatima, koja sadrži broj i datum rješenja kojim je odobrena izrada pečata, naziv organa kome je odobrena izrada pečata, otisak pečata, broj primjeraka pečata, datum predaje pečata na upotrebu, kao i podatke o uništenju ili nestanku pečata.

Radi evidencije iz prethodnog stava, organ kome je odobrena izrada pečata dužan je, odmah nakon izrade pečata, Ministarstvu pravde dati otisak pečata i obavijestiti Ministarstvo o datumu početaka upotrebe pečata.

IV - ČUVANJE I UPOTREBA PEČATA

Član 12.

Pečatom rukuje i upotrebljava ga funkcioner koji rukovodi organom iz člana 2. ovog zakona.

Pečatom može rukovati i upotrebljavati ga i službeno lice organa koje posebnim rješenjem ovlasti funkcioner iz prethodnog stava.

Član 13.

Pečat Kantona čuva i upotrebljava lice koje ovlasti Skupština Kantona.
Pečat Kantona stavlja se na originale zakona prije njihovog objavljivanja.

Član 14.

Pečat se stavlja sa lijeve strane pored potpisa lica ovlaštenog za potpisivanje službenih akata.

Član 15.

Pečati se moraju čuvati i upotrebljavati tako da se onemogućí njihova zloupotreba.

O načinu čuvanja i upotrebe pečata odlučuje funkcioner koji rukovodi organom.

U organu se vodi posebna evidencija o svim pečatima koji su u upotrebi kod toga organa.

Član 16.

Pečat koji je, zbog istrošenosti ili iz drugih razloga, postao neupotrebljiv, mora se odmah uništiti, o čemu se stara funkcioner koji rukovodi organom ili službeno lice ovlašteno za čuvanje i upotrebu pečata.

Pečat se smatra neupotrebljivim zbog istrošenosti, ako se iz njegovog otiska jasno ne vidi tekst koji daje otisak pečata.

Uništavanje neupotrebljivih pečata vrši Ministarstvo.

Član 17.

Funkcioner koji rukovodi organom uprave ili službeno lice ovlašteno za čuvanje i upotrebu pečata, dužni su odmah prijaviti nestanak pečata Ministarstvu unutrašnjih poslova Kantona i oglasiti u "Službenim novinama Kantona Sarajevo".

Nestali pečat smatra se nevažećim od dana oglašavanja u "Službenim novinama Kantona Sarajevo", a u slučaju kasnijeg pronalaženja, nevažeći pečat će se uništiti.

Novi pečat koji se izrađuje umjesto nestalog pečata mora biti posebno označen.

V - KAZNENE ODREDBE

Član 18.

Novčanom kaznom u iznosu od 3.000 do 10.000 KM kazniće se za prekršaj pravno lice koje izradi pečat a nema pravo na upotrebu pečata u skladu sa članom 2.ovog zakona.

Za prekršaj iz stava 1. ovog člana kazniće se odgovorno lice u pravnom licu novčanom kaznom u iznosu od 1.000 do 3.000 KM , a fizičko lice (obrtnik) novčanom kaznom od 1.500 KM.

Član 19.

Novčanom kaznom u iznosu od 1.500 do 7.500 KM kaznit će se za prekršaj organ iz člana 2. ovog zakona koji ima svojstvo pravnog lica, ako ne dostavi na uništenje dotrajali pečat (član 16.) ili ako na propisan način ne oglasi nestali pečat (član 17.).

Za prekršaj iz prethodnog stava kaznit će se i odgovorno lice u organu iz člana 2. ovog zakona, u iznosu od 500 do 1.000 KM.

Član 20.

Novčanom kaznom u iznosu od 3.000 do 10.000 KM kazniće se za prekršaj pečatoreznica-pravno lice ako:

- izradi pečat bez ovlaštenja Ministarstva i bez rješenja o odobrenju izrade pečata (član 7),
- izradi pečat, po sadržini, dimenzijama, broju primjeraka ili od materijala, suprotno rješenju Ministarstva (član 7),
- ako postupi suprotno članu 10.ovog zakona.

Za prekršaj iz stava 1. ovog člana kazniće se za prekršaj odgovorno lice u pečatoreznici- pravnom licu novčanom kaznom u iznosu od 1.000 do 3.000 KM.

Za prekršaj iz stava 1. ovog člana kazniće se za prekršaj fizičko lice koje ima pečatoreznicu (obrtnik) novčanom kaznom od 1.500 KM.

Uz novčanu kaznu predviđenu za prekršaj iz stava 1. alineja 3. ovog člana, pečatoreznici-pravnom licu i fizičkom licu koje ima pečatoreznicu (obrtniku) izriče se zaštitna mjera oduzimanja matrica i neuspjelih i probnih primjeraka pečata.

Član 21.

Ovlašteni organ za izricanje prekršajnih sankcija putem izdavanja prekršajnog naloga i za pokretanje prekršajnog postupka je Ministarstvo.

VI - PRELAZNE I ZAVRŠNE ODREDBE

Član 22.

Na rad pečatoreznice i postupanje organa iz člana 2. ovog zakona, shodno se primjenjuje Uputstvo o radu pečatoreznice, načinu vođenja evidencije o izrađenim pečatima, uništavanju pečata, nestanku pečata i evidenciji o pečatima i označavanju novih pečata ("Službene novine Federacije BiH", broj 16/96).

Član 23.

Organi iz člana 2. ovog zakona podnijet će zahtjev za izradu pečata, u skladu s odredbama ovog zakona, u roku od 60 dana od dana stupanja na snagu Zakona o pečatu Kantona Sarajevo ("Službene novine Kantona Sarajevo", broj 9/99).

Član 24.

Danom stupanja na snagu Zakona o pečatu Kantona Sarajevo ("Službene novine Kantona Sarajevo", broj 9/99) prestaje da važi Privremena odluka o pečatima ("Službene novine Kantona Sarajevo", br. 5/96, 7/96, 4/97 i 13/98).

Član 25.

Zakon o pečatu Kantona Sarajevo ("Službene novine Kantona Sarajevo", broj 9/99) stupa na snagu osmog dana od dana objavljivanja u "Službenim novinama Kantona Sarajevo".

Član 26.

Izmjena člana 2. stav 1. alineja 8. Zakona o pečatu Kantona Sarajevo izvršena Zakonom o izmjenama i dopunama Zakona o pečatu Kantona Sarajevo ("Službene novine Kantona Sarajevo", broj 16/03) primjenjuje se od dana početka rada Kantonalnog tužilaštva Kantona Sarajevo, utvrđenog u skladu sa Zakonom o kantonalnom tužilaštvu Kantona Sarajevo ("Službene novine Kantona Sarajevo", broj 22/02).